

आकाशवाणीखबरां

1. संसद दे दौनें सदनं च अज्ज बी बरोधी धड़ें दे मिम्बरें दी डंड रौली दे चलदे कोई खास कम्मकार नेई होई सकेआ, दौनें सदनं दी कार्रवाई कल्लै तगर स्थगित।
2. बरोधी धड़ें दी डंड रौली दे हंगामे दे बावजूद अज्ज 4 बिल सदन च पेश कीते गे, ट्रिब्यूनल सुधार तरमीमी बिल-2026 गी मंजूरी थोई।
3. झारखंड च प्रदर्शनकारी विद्यार्थिं अज्ज विधानसभा दा घेराब कीता, पुलसै कन्नै हत्थापाई, भीड़ गी काबू करने लेई अत्थरूं गैस दा इस्तेमाल कीता गेआ।
4. हर घर तरंगा अभिजान दा मुलख भरै च जोश दिक्खने गी लब्बा करदा ऐ, कश्मीर थमां कन्याकुमारी तगर देश प्यार दा जोश।
5. पूर्वी चीन च चक्रवाती तूफान डालफिन गी दिखदे होई 10 लक्ख कोला मते लोकें गी सुरक्षित थाहरें पजाया गेआ।
6. अज्ज विश्व शेर दिवस दे मौके पर प्रधानमंत्री मोदी होरें दस्सेआ जे भारत च इन्दे रौहने माफम म्हाँल च बी विस्तार बाद्दा होआ ऐ।

<><><><><><>

Parl. Adjourned

अज्ज 10 अगस्त गी बी संसद दे दौनें सदनं दी कार्रवाई बरोधी धड़ें दे हंगामे दे चलदे कल्लै धोड़ी स्थगित करी दित्ती गेई। बार-बार ठाकने पर बी जिसलै बरोधी पार्टिं दे मिम्बरें अपना रौला रप्पा जारी रक्खेआ तां इसी मंगलवार 11 अगस्त धोड़ी स्थगित करी दित्ता गेआ। विपक्षी सांसद प्रदर्शनकारी विद्यार्थिं पर पुलस दी कार्रवाई ते होरनें मुद्दे गी लेइयै केंद्री गृह मंत्री हुंदे बयान दी मंग गी लेइयै अड़े दे रेह। इस डंड रौली दे चलदे राज्यसभा दियां बैठकां एंगै सिर नेई चली सकियां ते कम्मकार कल्लै तगर टाली दित्ता गेआ। तोआई लोकसभा च बरोधी मिम्बरें दे रौले दे चलदे ट्रिब्यूनल रिफार्म बिल-2026 सने किश होर विधेयक पेश ते पास कीते गे। राज्यसभा च बी अज्ज बैंक कार बेहीखाता सबूत बिल पास कीता गेआ।

<><><><><><>

Rijiju-Protest Discussion

संसदी मामलें दे मंत्री किरन रिजिजू होरें अज्ज आखेआ ऐ जे सरकार विद्यार्थिं दे बरोध-प्रदर्शन ते एहदे नै जुड़े दे मुद्दे पर संसद च तफसीली चर्चा करने लेई तैयार ऐ। संसद भवन परिसर च पत्रकारें कन्नै गल्ल करदे होई किरन रिजिजू होरें आखेआ कि छात्र आंदोलन पर पूरी तफसील च चर्चा दिल्ली च ते मुलख भरै च विद्यार्थिं कन्नै सरबंध्यत जेह्दे बी आंदोलन चलै करदे न, उंदे पर संसद च चर्चा कीती जाई सकदी ऐ। उनें कांग्रेस पार्टी ते होरनें बरोध धड़ें गी अपील कीती जे हून जिसलै सरकार इस मुद्दे पर चर्चा लेई तैयार ऐ तां ओह संसद च भलेयां कोई डंड रौली नेई पान ते जेकर ओह इयां करदे न तां संसद दी कार्रवाई रमानदारी आहले ढंगै सिर चली सकग ते इस मुद्दे पर बी चर्चा पूरी होई सकग। एहदे शा पैहले राज्यसभा च विपक्ष दे नेता मलिकार्जुन खडगे होरें विद्यार्थिं खलाफ कीती गेदी कार्रवाई पर गृह मंत्री हुंदे बयान दी मंग कीती। खडगे होरें आखेआ कि ओह पिछले 17एं दिनें थमां एह कोशश करा करने आं जे ओह सदन च आइयै इक बयान देन। उनें आखेआ कि चर्चा करना विपक्ष बी चाहंदा ऐ पर अस्स गृह मंत्री हुंदे मुंहा उंदा केह आखना ऐ, इस बारै एह सुनना चाहंने आं।

<><><><><><>

Cyber Fraud Network

दिल्ली पुलसै अज्ज इक अंतरराष्ट्री साइबर फ्राड गिरोह दा भंडाफोड़ करियै 9 लोकें गी गिरफ्तार करी लैता ऐ। एह गिरोह चोरी कीते गेदे मोबाइल फोन ते उंदे नै जुड़े दे बैंक खातें दा इस्तेमाल ठगी दिएं वारदातें गी अंजाम देने लेई करदे हे। अज्ज नमीं दिल्ली च मीडिया गी जानकारी दिंदे होई डी.सी.पी सेंटरल, रोहित राजबीर सिंह होरें आखेआ जे शुरूआत जांच च नेशनल साइबर क्राइम रिपोर्टिंग पोर्टल पर दर्ज 19 कोला मते मामलें च इस गरोह दा हत्थ पाया गेआ ऐ। जिंदे च करीब 65 लक्ख रुपें दी ठगी दा अंदाजा ऐ। जानकारी मूजब एह गरोह जयपुर,

मेरठ ते गाजियाबाद थमां होइयै अपना नेटवर्क चला करदा ह। ठगी दियां शकैतां महाराष्ट्र, बिहार, तमिलनाडू, तेलंगाना ते ओडिशा थमां हासल होई दियां हियां।।

<><><><><><>

Jharkhand Protest

झारखंड दी राजधानी रांची च अज्ज जे.पी.एस.सी ते जे.एस.एस.सी मतेयानें च पेपर लीक ते बेजाब्लिएं दे बरोध च विद्यार्थीं बरोध प्रदर्शन करदे होई विधानसभा दा घेराब कीता। प्रदर्शनबारी केइ बैरिकेट त्रोटियै विधानसभा दे भलेआं कश पुज्जी गे जिल्ये पुलसै कन्नै उंदी शैल झडप्पां होइयां ते हालात काबू शा बाहर होने शा रोकने लेई अत्थरुं गेस दे गोलं दा इस्तेमाल कीता गेआ। एह विद्यार्थी पिछले केइं दिनें थमां पेपर लीक मामले च सीबीआई दी जांच ते पेपर रद्द करने दी मंग गी लेइयै प्रदर्शन करा करदे न। तोआई, झारखंड सी.आई.डी नै मतेयानें च बेजाब्लिएं दे मामले च जे.पी.एस.सी दे साबका अध्यक्ष एल. खियांगटे गी गिरफ्तार करी लैता ऐ।

<><><><><><>

Seth Ranchi

केंद्री मंत्री ते रांची थमां संसद संज सेठ नै झारखंड च भर्ती मतेयानें च कथित गड़बड़ियें दी अजादाना जांच लेई हुक्म देने च राज्य सरकार नै मंजूरी पर सोआल पुट्टेआ ऐ। संसद भवन परिसर च आकाशवाणी समाचार कन्नै इक चेची गल्लबात दुरान सेठ होरें आखेआ कि जेकर विद्यार्थी एह मतेयान रद्द करने दी मंग करा करदे न तां राज्य सरकार गी एह साफ करना लोडचदा कि ओहू इस मंग गी की नेई मन्ना करदी। उनें आखेआ जे बच्चे सी.बी.आई आसेआ जांच करोआने दी मंग करा करदे न ते सरकार गी उंदी एह मंग मन्नी लैनी लोडचदी तां जे दुध दा दुध ते पानी दा पानी होई सकै।

<><><><><><>

Har Ghar Tiranga

मुख्य भरै च “हर घर तिरंगा” अभियान मनाया जा’रदा ऐ। एदा मकसद देशभक्ति, राष्ट्रीय एकता ते भारत दी समृद्ध सांस्कृतिक विरासत गी बढ़ावा देना ऐ। इस अभियान तैहत नागरिकें गी राष्ट्रीय झंडा फैहराने ते सरबन्धी गतिविधियें च हिस्सा लैने लेई प्रेरित कीता जा’रदा ऐ। इस बरे एह अभियान होर बी उत्साह ते जोश कन्नै मनाया जा’रदा ऐ कि जे एह “वंदे मातरम” गी समर्पित ऐ ते “वंदे मातरम” दी रचना दे 150 बरे पूरे होआ रदे न।

<><><><><><>

PM –Har Ghar Tiranga

प्रधानमंत्री नरेन्द्र मोदी होरें नागरिकें थमां “हर घर तिरंगा” अभियान च उत्साहपूर्वक हिस्सा लैने ते विकसित भारत दे निर्माण च योगदान देने ते अपने सामूहिक संकल्प गी नवीकृत करने दा आग्रह कीता ऐ। मोदी होरें सोशल मीडिया पोस्ट च आखेआ जे तिरंगा साहडा गौरव ऐ ते राष्ट्र आस्तै अपना सर्वश्रेष्ठ देने दी लगातार प्रेरणा दा स्रोत ऐ। प्रधानमंत्री होरें आखेआ जे उनें गी खुशी ऐ जे इस बरे दे जत्र “वंदे मातरम” गी समर्पित न ते ओह बी ऐसे समें पर जिसले इसदी 150मीं बरेगंड मनाई जा’रदी ऐ।

<><><><><><>

Har Ghar Tiranga Districts

जम्मू संभाग दे “हर घर तिरंगा” अभियान 2026 ते राष्ट्रीय गीत वंदे मातरम दी 150मी जयंति दे जश्र दे त्रीए चरण दी शुरुआत कल कीती गेई। देशभक्ति संस्कृति ते खेडू गतिविधियें कन्नै भरपूर एह अभियान 17 अगस्त 2026 तक जारी रहैगा। डोडा च इस अभियान दी शुरुआत डी.सी. आफिस काम्पलेक्स थमां होई ते उत्थुआ तिरंगा रैली कड़ी गेई। रैली च अधिकारियें विद्यार्थीयें ते सरकारी कर्मचारी हिस्सा लैता। भद्रवाह च बी इक बड़ी तिरंगा रैली कड़ी गेई। जेहजे च NCC कैडेटें, विद्यार्थीयें, अधिकारियें ते सिविल सोसाइटी दे सदस्यें बधी-चड़ियै हिस्सा लैता। कुठआ दे GMC आडिटोरियम च इस अभियान दा उदघाटन कीता गेआ। इस मौके पर विद्यार्थीयें वंदे मातरम राष्ट्रीय झंडा ते राष्ट्रगान दी महत्ता पर लौ पाई। कार्यक्रम दा समापन वंदे मातरम दे सामूहिक गान कन्नै कीता गेआ। रामबन च इस अभियान दी शुरुआत दे मौके पर देशभक्ति कन्नै जुड़ी दियां बक्ख-बक्ख गतिविधियां कराइयां गेइयां, जेहदे च Selfie With Tiranga, Singing of Vande Matram ते Screening of Short Film शामिल हियां।



Kashmiri-diaspora Protest

इटली दे बोलोन्या शैहरा च रवा करदे कश्मीर प्रवासिएं पाकिस्तान दे कब्जे आहले जम्मू-कश्मीर च पाकिस्तानी सुरक्षाबलें दिएं जालमाना कारवाइएं, आम लोकें दी हत्याएं ते मनुक्खी अधिकारें दी खलाफवर्जी खलाफ इक बड्डी बरोध-प्रदर्शन ते शांति मार्च कडुआ। प्रदर्शनकारिएं पी.ओ.जे.के दे नागरिक संगठन जायंट अवामी एक्शन कमेटी दे समर्थक च नारे लाए ते पाकिस्तानी सुरक्षाबलें खलाफ बी जोरदार नारेबाजी कीती।



China-Typhoon

पूर्वी चीन च जबरदस्त चक्रवाती तूफान डालफिन दे टकराने कोला पैहले ते ओहदे औने शा बाह् अधिकारिएं शंघाई समेत केई बक्ख-बक्ख इलाकें च 10 लक्ख कोला मते लोकें गी सुरक्षित थाहरें पर पुजाई दिता ऐ। इस तूफान करी प्रभावित प्रमुख इलाकं च झेजियांग, युहुआन बेंझू, फुजियान ते शंघाई शामिल ना। जिसलै एह तूफान समुंद्री कंडे कन्नै टकराया उसलै ओहदी रफ्तार 150 किलोमीटर फही घंटा ही। शंघाई दे ब्हाई अड्डे पर एहतियात दे तौरा पर 1300 कोला मतियां ब्हाई डोआरियां रह कीतियां गेइयां ना। एल्लै तूफान दी रफ्तार बडी मट्टी होई चुकी दी ऐ पर एहदे कारण केई इलाकें च तेज बरखा बरै करदी ऐ।



Ukraine-Drone

रूस दे इक अंदरूनी शैहर निज्नेकामसक च अज्ज युक्रेन आसेआ कीते गेदे इक ड्रोन हमले च घटोघट्ट 12एं जनें दी मौत होई गेई ऐ ते 39 दुएं दे घायल होने दी खबर ऐ। निज्नेकाम मास्को कोला 600 मील अंदर पूर्व दिशा च स्थित ऐ ते उत्थै भलेयां अज्जै-कल्लै दी टेक्नोलाजी आधारित तेल रिफाइनरी ऐ ते इयां बझोंदा ऐ कि इससै रिफाइनरी गी गै नशाना बनाइयै एह हमला कीता गेआ होग।



Lion Day

अज्ज विश्व शेर दिस ऐ। प्रधानमंत्री नरेंद्र मोदी होरें इस मौके आखेआ कि भारत दे एशियाई शेरें दी गिनतरी च सराहनेजोग बाद्दा दर्ज कीता जा'रदा ऐ ते उंदे रौहने लेई माफक म्हौल च बी विस्तार बाद्दा होआ ऐ। उनें केंद्री मंत्री भूपेंद्र यादव हुंदे इक लेख गी सांझा कीता ते दस्सेआ जे समुदाय दी सक्रिय शमूलियत कन्नै जंगली जनौरें दी राक्खी हिफाजत ते उंदी प्रजातियें दे संरक्षण लेई सरकार लगातार जत्न करा'रदी ऐ।



PM-CWG Medalists

प्रधानमंत्री नरेन्द्र मोदी होरें जंदे रोज नमीं दिल्ली च अपने आवास पर राश्ट्रमंडल खेड्डू-2026 दे तगमें जितने आहलें खडारियें कन्नै मुलाकात कीती। तगमें जितने आहलें खडारियें प्रधानमंत्री हुंदे कन्नै गल्लबात दौरान, खेड्डुं कन्नै जुडे दे अपने अनुभव सांझा कीते। इक सोशल मीडिया पोस्ट च मोदी होरें आखेआ जे सब्बै खडारियें अपने शानदार प्रदर्शन कन्नै देश दा मान बधाया ऐ। उ'नें आखेआ जे खडारियें दी सफलता केई युवाएं गी प्रेरित करोग। मोदी होरें इक वीडियो संदेश सांझा करदे होई आखेआ के जेहडे युवा खेड्डुगंन, ओह अगगे बध्गंन ते नागरिकें गी हमेशा भारत दा उत्साह बधाने दी अपील कीती। प्रधानमंत्री हुंदी खडारियें कन्नै मुलाकात दौरान युवा मामलें ते खेड्डू मंत्री मनसुख मंडाविया ते युवा मामलें ते खेड्डू राज्य मंत्री रक्षा निखिल खडसे बी मौजूद हे। स्कॉटलैंड दे ग्लासगो च 23 जुलाई शा 2 अगस्त तगर आयोजित राश्ट्रमंडल खेड्डुं च भारत तगमे आहली तालिका च चौथी थ्हार पर रेआ। भारत ने कुल 39 तगमें जित्ते जिंदे च 13 सुन्ने दे 17 चांदी दे ते 9 कैह दे तगमें शामिल ना।



IMD

मौसम विभाग नै अगले 24 कोला 48 घंटें दरान पूर्वी राजस्थान, हिमाचल प्रदेश, उत्तराखंड ते पच्छिमी राजस्थान च मौलेधार बरखा दा अलर्ट जारी कीता ऐ। हरियाणा, चंडीगढ़, पंजाब, उत्तर प्रदेश, बिहार, विदर्भ, असम ते मेघालय च बी कल्लै तगर तेज बरखा जारी रौहने दी पेशनगोई कीती गेदी ऐ। एहदे अलावा जम्मू-कश्मीर, झारखंड, कर्नाटक, केरल, माहे, पच्छिम बंगाल, छत्तीसगढ़ ते आंध्र प्रदेश च अज्ज ते कल बिजली मिलकने ते गर्ज चमक कन्नै बरखा बरने दे असार दस्से गे ना।

NH-44 Closed

किश्तवाड़ च लगातार बरखा दे चलदे किश दिन पैहले छात्तरू इलाके च बहल फटने दी इक घटना पेश आई ही जेहदे करी किश्तवाड़ गी कश्मीर कन्नै जोड़ने आहली एन.एच-244 गी पूरी चाल्ली बंद करी दिता गेआ ऐ। बहल फटने करी छात्तरू च कोई घरे-मकानें, हट्टियें जेएंडके बैंक दी इक शाखा गी बी नुकसान पुज्जा ऐ। इस कुदरती आपदा करी मकामी बसनीकें गी बी बड़ा मता नुकसान पुज्जा ऐ। इस घटना दे बाद NHIDCL नै शिड़कै गी परतियै खोलने लेई पुर्नबहाली आहला कम्म शुरू कीता हा, पर कल रातीं इक बारी फही भारी बरखा होने करी छात्तरू च हाड़ आई गेआ। पानी जमा होने करी जरनैली शिड़क इक बारी फही बंद होई गई ऐ।